



VERSCHNUUFFER

www.verschnuuffer.ch

FASNACHT 2017

Bim Teutates, d Wält spinnt!

Die ganz Schwyz isch vo Schwyzer bsetzt!
Was luegsch uf aimool so entsetzt?
- Die ganz Schwyz? – Nai, natyrlig nid,
well s – Zeus sei Dangg – no Basler git!

Vo Downtown Basel bis no Rieche
sin mir doch alles gaili Sieche!
Mir sin e wirgglig glatte Huffe,
wo sehr gärn rauche, frässe, suffe!

S isch ai Idylle und ai Friide
und ändloos Gligg isch ys beschiide.
Die rooti Eva isch ys hold,
drum fäält s ys nie an Strytt und Gold.

O Basilea nostra sancta,
Du bisch dä Hort, wo-n-ych druf blangt hal!
Wenn s Di nid gäbt, do an mym Rhy,
no liesst ych s Lääbe grad lo syy!

Doch – bim Teutates – gseen ych rächt?
Y glaub mir wird voor Schregg grad schlächt!
Was um das Basel umme goot,
isch pyynlig, fräch! Me wird grad root!

S het s Baselbiet – dert foot s scho aa –
kai Aanig vo Pecunia.
E groosse Latz und nyt derhinder,
drum wirsch dert aapumpt umso gschwinder!

Au d Räscht-Schwyz isch nid ganz im Lot
s haisst BILLAG, MEI dert s tääglig Brot.
D Arme bringt s fertig ganz ellai
stellt sich uf d Fiess e Hinkelstai!

Der Globus um ys spiilt verruggd
s wird d Ratio aifach underdruggd!
Denn selig sin die geischtlig Arme,
drum hän mir mit ys sälbscht Verbarne!

O mächtige Teutates, hilf!
Denn ooni Di steen mir im Schilf!
Die spinne, wo no z Basel woone
und linggi Randalierer schoone!
Die spinne, wo mit ihrem Kaare
in d Innerstadt wänn ynefaare!
Die spinne, wo am Rotliecht halte
und wo no brämse fir die Alte!
Die spinne, wo dien d Kinder pushe,
und voor em Christoph Blocher kusche!
Die spinne, wo Zalando nutze
und s Gäld im Schwoobeland verputze!
Die spinne, wo der Trump dien wääle –
au die, wo d Clinton klar empfääle!
Die spinne, wo mit ... ähm mit ...
saag mir doch aimool kurz, y bitt:
Wär spinnt uf däre Wält eich nid?
E species rara, wo s no git?

O Belenus, so hilf ys doch,
befrey ys vo däm Spinner-Joch!
D Cäsare, wo mir hit so gseen
sin alli schwär oligophren!

Der Putin ka zwar nid guet tanze
zaigt ys derfir sy blutte Ranzel!
D Frau Merkel findet Flüchtling toll,
ihr Boot goot under und lauft voll.
Der Hollande, dä het s langsam gsee,
sait: Lägget mir am Elysee!
Und s Luschtige am Berlusconi
isch, dass me merggt, es goot au ooni!
Dass me regiert wird, vo so Kälber
drait jeede d Schuld e weeni sälber!

Mir leese z Basel das Problemeem
mit em Donald'sche Theorem
und baue um s Refugium
e ganz e hoochi Muure drum.

„O salve, wärti Civitas!
Erhebet s Poculum (dasch s Glas)
und stoosset mit ys zämmen aa,
dass ys die Räschtwält gryzwyys kaa!“

Au unseri Ladäärne kaasch vom Määntig z'Nacht bis am
Mittwuch am Morge uff em Minschterplatz bestuune.

Bisch e Kind, mechtsch Fasnacht mache,
denn git's kaini halbe Sache!
So schrib denn unsere Obmaa aa
und mäld Di gschwind zem Yyschtooo aa.

Yyneluege: Samschtig 11.03.2017
14.00-16.00 Uhr im Cliquekäller an dr Malzgasse 9 in Basel

Mir fraie uns uff Di!

Fir Informatione mäldsch Di bim Obmaa:
Pascal Studer, Verschnuuffer Gnepf, Malzgasse 9,
4052 Basel, email: gnepf@verschnuuffer.ch